

„Koepoe - koepoe poeti”

DJILID KA 3.

Tjin Tjeng semingkin-mingkin menghormat-
ken njonja itoe, dengen tiada merasa ia
mengeloearken ini perkataän :

„Dengan kepandean jang begini bagoes,
moesti djato dalem tangannja itoe lelaki. Oh,
kesian sekali !“

„Akoe ini memang toeroenannja satoe
sastrawan, tetapi apa-maoe soeda nasibkoe
begitoe !“ berkata Thaij-thaij dengen aer-
mata jang djato sekoenjoeng-koenjoeng :
„Djikaloe dengen tenaganja Kwi Koan, pe-
nasaran hatikoe bisa terbales, akoe ber-
soempa nanti koetoengin ramboet dan ma-
soek dalem pintoe soetji. Sama sekali akoe
tiada harep poela boeat idoep berkoempoel
dengen itoe lelaki.“

Tjin Tjeng mengela napas pandjang dan
kemoedian laloe menanja lagi pada Thaij-
thaij, apa jang njonja itoe dapet taoe lebi
banjak prihal jang berhoeboeng dengen per-
kara ini ?

Thaij-thaij poen laloe menjeritaken satoe persatoe dari segala apa jang ia dapet de-nger sewaktoe mengintip.

„Astaga!” katanja Tjin Tjeng dengen terprandjat sesoeda mendenger habis itoe penoetoeran, „njatalah ini ada satoe perboeanan jang bisa meroesakin keamanan negri! Aken tetapi bagi Thaij-thaij, hamba merasa tiada baeknja djikəloe moesti berdiam dalem roema hamba, kerna koeatir bisa menimboelken orang poenja boeah-toetoer jang tiada enak. Sebla kiri dari kan-toor ini ada seboeah gredja, Soei Gwat Sian Lim, tempatnja soenji dan njaman, jang menjadi tetoeanja jalal pendita prempoean, Go Hoen. Orangnya soeda beroesia tinggi, djoega tadinja ada berasal dari satoe poetri bangsawan. Hamba moehoen Thaij-thaij soeka berdiam sadja di sana boeat sedikit waktoe dan hamba nanti mengirim orang merawatin Thaij-thaij.”

Thaij-thaij dengen lekas bangoen berdiri dan membri hormat, sebagi mengoendjoek iapoenja hati jang bertrima-kasi.

Tjhio Sie Hoedjin menitah iapoenja doeboedak prempoean aken mengikoet Thaij-thaij ka Soei Gwat Sian Lim.

Samentara Pauw Tjin Tjeng jang setelah menganter Thaij-thaij berlaloe dari kantoor-nya, langsoeng ia masoek ka dalem kamar toelisnya, menoelis satoe proces-verbaal, dengan bersama itoe soerat pendakwaän jang pertama laloe mengatoer aken kirim pada pembesar iang lebi atas; demikianpoen ber-ikoet itoe ia lampirken lagi laen soerat jang menjeritaken sedjelas-djelasnya tentang kedja-dian di Tek Tjioe berhoeboeng dengan pe-njamoen prempoean. Koepoe-koepoe poeti, jang telah merampas pendjara, melawan ba-risan negri dan laen-laennya.

Itoe waktoe, jang mendjabat kebesaran Gouverneur dari provincie Kang So, jalah Tjiong Peng Tit, saorang pembesar jang sanget adil, tjerdik dan brani, sesoedanja mendapet trima ini soerat-soerat. ia djadi menepok medja dan berkata saorang diri dengan morka :

„Sesoenggoe-soenggoenja inilah ada satoe perboeatan jang terlaloe kedji! Tiada tjoë-ma dia soeda kendakin bininja satoe pem-besar, tapi djoega ada niatan aken menjilakaken bini sendiri; laen diri ini, diapoен soeda mempoenjai pikiran aken menoetoepin itoe satoe perkara besar dari Tek Tjioe dan

pandeng oeroesan negri tiada lebi seperti satoe barang permaenan. Oh, oh, tiadakah dia satoe manoesia binatang?"

Semingkin berpikir semingkin besar rasa penasaran hatinja, laloe dengen membawa semoea socrat-soerat itoe, bersama Gouverneur Generaal madjoe mengadep sri-baginda keizer dan melakoeken ini protest.

Baginda keizer djoega soeda mendjadi amat goesar atas itoe hal, langsoeng mengeloearken satoe firman jang memetjat Ong Lian dari kebesarannja boeat samentara wak-toe dan perkaranja boleh moelai dipreksa, jang boeat mana dioetoes sala satoe hakim besar sigra brangkat ka Kang So dan bersama dengen Gouverneur Tjiong Peng Tit boleh lantas dilakoeken pemereksaän. Pada Gouverneur dari provincie San Tong dikiirim tegoran agar soepaja madjoeken bala-tentara boeat membasmikan kawanan penjamoen dari goenoeng Hong Beng San.

Satoe kali ini firman kaloear, Ong Lian ketakoetan setenga mati, sambil berdaja boeat menoeloeng dirinja sendiri, sambil djoega dengen diam-diam manganter njonja assistent dari Tek Tjioe poelang ka kotanja.

Ini Thaij-thaij jang dapet taoe perker-

djaännja soeda mendjadi gagal, malahan djoega telah berboentoet pandjang, dalem hatinja boekan maen poenja mendongkol dan penasaran. Tetapi Tjoe Dji di sepan-djang djalan sebisa-bisanja telah tjoba menghiboer dan paling achir ia soeda berkata dengen ketawa:

„Oh, Thaij-thaij, kaoe haroes djangan terlaloe berkesel hati. Maskipoen bener firman keizer ada begitoe keras, tapi toch boeat Loja sendiri masi belon berarti satoe rintangan besar. Maka djikaloe soeda poe-lang di gedong sendiri, Thaij-thaij haroes memboedjoek Loja soeka korbanken oewang-nja, membri oepa si „Tjelengan-botjor” soe-ami-istri, boeat marika dengen djalan gelap membinasaken si „Koepoe-koepoe poeti,” jang bila bisa kedjadian begitoe, boekan sa-dja kita terloepoet dari dosa, tapi djoega bisa diharep aken dapet laen gandjaran.”

„Bitjaramoe sadja jang roepanja ada be-gitoe gampang.” berkata Thaij-thaij, „kaoe tentoe belon pikir, „Koepoe-koepoe poeti” itoe, datengnja seperti angin dan perginja seoepama oedjan! Siapa itoe „Tjelengan botjor” jang bakal bisa membinasaken pa-danja?”

Tjoe Dji lantas menjeritaken satoe persatoe tentang akal-akal apa jang Siauw Leng Kan lagi hendak lakoeken bersama iapoenja kontjo-kontjo. Dan Thaij-thaij jang setelah mendenger habis semoea tjerita itoe, bener djoega hatinja moelai lega sedikit.

Di itoe hari, praoe ini sampelah di Tek Tjioe, njonja assistent laloe mengendraï djoli kombali ka astananya sendiri. Di sitoe tentoe sadja ia tiada menjeritaken sebenernya tentang apa soeda kedjadian di Tjeng Kang hanja pada sang soeami, ia membilang:

„Setaoe lantaran perkara apa, Ong Pat Taijdjin boeat samentara waktoe telah dipetjat kebesarannja oleh firman baginda keizer. Aken tetapi, diapoenja kesaktian tjoe-koep tinggi, bisa dipastiken sedikit hari lagi dia aken berbalik sebegimana biasa. Tempo akoe hendak poelang dia soeda memesen, sebisa-bisanja Koepoe-koepoe poeti itoe moesti dapet ditangkep, boeat mana, kaoe haroes djangan terlaloe sajang mengeloear-ken oewang. Pepata koeno toch ada membilang: „Dapet meninggalken goenoeng jang idjo, traoesa koeatir bakal kekoerangan kajoe bakar!” Sedeng dia ini koetika sekali poen terloetjoet dari pangkatnja, tetapi dia

masi mempoenjai banjak djalan boeat di loear dan dalem kota-radja, hingga dengen gelap senantiasa dia membantoe kita."

Si „njepit-tiga” mendenger ini perkataän, tinggal diam boeat sekoetika lamanja, sekoenjoeng-koenjoeng dengen mengela napas pandjang ia berkata:

„Akoe menjesel tiada bisa seperti Ong Pat Taijdjin jang djoega terpetjat dari pangkatkoe, agar soepaja traoesa ngalamin lagi ini berbagi-bagi kedjengkelan dan kemasgoelan hati.”

Semandjek terdjadinya itoe perdjalanan dari njonja assistent Tek Tjioe ka Tjeng Kang Koan, timboellah berbagi-bagi boeah-tjeritaän di loearan jang tiada sedep didenger-nja. Inilah membikin si „njepit-tiga” tiada bisa tinggal seneng; apalagi djikaloe ia pikir Generaal Inspecteur dari ini provincie. Kiat Soei, jang orang gelarken: „toembak-tiga” bila dapet trima firman Baginda, nis-tjajalah aken soeker boeat ia tinggal idoep slamet dalem Tek Tjioe.

Pikir poenja pikir, hatinja tamba bersedih dan achirnja ia laloe melepaskan soeara tangisan jang keras.

Dalem begitoe, tiba-tiba orangnya telah

masoek merapport dan berkata:

„Siauw Leng Kan lagi membawa satoe orang aken berdjoempa Loja!“

Tie-koan keringin aer-matanja dan prenta silaken itoe orang boleh masoek ka dalem.

Selagi hati dalem berdoeka,
Atawa dalem dada merasa loeka;
Dalem saät tiada disangka,
Orang dateng boeat ketemoe moeka.

Menjoempel Tjelengan.

Sjahdan Tie-koan jang lebi doeloe prenta panggil masoek Siauw Leng Kan dan dapet liat aer-moekanja orang siapa ada begitoe goerém, poetjet dan lesoe, djoega ia bertindak seperti orang males dan sama sekali tiada beroembira.

„Eh, kenapa roepamoe keliatan begitoe tjilaka?“ Tanja Tie-koan.

Siauw Leng Kan menggigit-gigit giginja dan dengen soeara mengroetoe ia menjaoet:

„Itoe Koepoe-koepoe poeti, si sialan dangkalan! boekan sadja dia soeda membinasaken seroema-tanggakoe, tapi djoega Tjoe Siauw Kauw dan Saij-jan-tji, toeroet-toeroet-an kena diboenoe mati oleh marika. Akoe tentoe merasa sanget penasaran, djikaloe tiada bisa menelen idoep-idoep dagingnja!“

Tie-koan diam-diam merasa girang sendiri dan dengen memboedjoek ia berkata:

„Oh, ja, kita sekarang njatalah seperti doe orang sakit jang saling mengesianin satoe dengen laen. Kaoe ada mempoenjai djalan beginana jang baek? Tjeritaken! Boeat membikin kaoe bisa berkerdja lebi leloeasa dalem ini hal, akoe ridla menjeraken padamoe 10.000 tael perak.“

„Kebetoelan sekali,” kata Siauw Leng Kan, „hamba dateng kemari adalah djoega tersebab itoe hal.”

Ia laloe menggape dengen tangannja dan satoe orang keliatan soeda berdjalan masoek ka dalem. Itoe orang berkepala kidang dan bermata tikoes, sedeng selebar moekanja penoe dengen sorot boeas dan kedjem, tetapi anggota badannja ada mengoendjoek kegesitan dan gapa. Ia madjoe ka depan membri hormat dan laloe berdiri di bawah tangga.

Dengen djeridji Siauw Leng Kan menoendjoek itoe orang dan berkata:

„Dia inilah ada si Koepoe-koepoe poeti ampoenja soedara Tjin-tong, Oh Ko, ber gelar „Tjelengan-botjor”, bersama istrinja „Siloeman oeler poeti” mempoenjain kebiasaan jang bagoes dan berbandingan dengen Koepoe-koepoe poeti. Dia, ada mempoenjai akal bagoes boeat bisa membalesken kita orang poenja sakit hati. Aken tetapi, Loja perloe sekali djandjiken oentoeng bagoes boeat dia, serta perlakooeken sepantesnya, teroetama djangan sekali Loja menaro tjoeriga hati apa-apa, agar soepaja kemoedian dia soeka berkerdja soenggoe-soenggoe

hati atas oeroesan kita.“

„Asal sadja dia maoe berkerdja soenggoean, segala apa akoe tentoe menoeroet dengan ridla hati,“ demikian katanja Tie-koan dengan mengela napas. „aken tetapi, kaoe orang soeda pikir akal begimana?“

„Koetika hamba mengetahoei Siauw Kauw kena terboenoe dan Kan Sam Ko poenja soerat dapet dirampas olehnya,“ berkata Oh Ko dengan soeara pelahan, „hamba laloe belaga pergi koendjoengin marika, menjeritakan satoe persatoe dari apa jang Kan Sam Ko lagi atoer. Dia mendenger tjeritakoe beroepa sanget girang dan membilang: „Ja, bener djoega satoe soedara ada laen dan moestail sekali maoe membantoe laen orang membikin tjilaka dirikoe. Aken tetapi, akoe ini satoe anak piatoe, tiada poenja orang toea; sekarang sesoedanja dirikoe tersera boeat Go Long, maka nanti di harian Pek-gwee Tiong-Tjhioe, pernikahankoe aken dilangsoengken. Dan Koko serta Soso, akoe moehoen bisa dateng lebi siang, agar bisa menjaksiken Moaij poenja perkawinan, djoega membantoe tilikin laen-laen oeroesan.“ Koetika dia bitjara sampe di sini, hamba laloe njataken seneng hati trima baek per-

moehoenannja itoe. Ini sebab, sekarang ham-
ba dateng bersama Kan Sam Ko mengadep
Loja, boeat menoenggoe begimana Loja am-
poenja poetoesan."

Tie-koan balik menanja pada Siauw Leng
Kan :

„Dan begimana pikiranmoe?"

„Terbaliknja kreta jang di depan, adalah
mendjadi toeladan boeat kreta jang di bla-
kang." Saoetnja Siauw Leng Kan : „Maka
djikaloe dia berkerdja tiada ati-ati, dia sen-
diri ampoenja djiwa aken lebi doeloe ter-
anter pertjoema, sedeng oewang jang bakal
oepanja nistjaja tiada beroena lagi boeat
dia. Apalagi hamba soeda mengoendang
„Permadani-poeti" dengen bebrapa soeda-
ra-soedara angkat boeat membantoe dalem
ini perkerdjaän. Laen dari itoe, kerna masi
koeatir ini koerang sampoerna, hamba te-
lah titah lagi semoea orang-orangkoe, ata-
wa menjaroë seperti soedagar, atawa me-
njaroë seperti pengemis, bersemboeni di se-
pandjang djalan. Dan padoeka Kolonel ber-
djandji aken membawa balatentara boeat
menjamboet dari blakang, hingga semoea
apa jang soeda diatoer, hamba rasa ampir
tiada mempoenjain kekoerangan poela."

Tie-koan mendjadi sanget girang, lekas djoega ia masoek ka dalem dan kemoedian kaloeear lagi dengen membawa oewang perak sedjoembla tiga-riboe tael, seraken pada Siauw Leng Kan, sambil berkata:

„Oleh kerna dalem satempo ini akoe belon bisa menjediaken tjoekoep oewang, maka itoe lebi doeloe biarlah trima sadja ini dan akoe tentoe tiada nanti moengkir dari perdjandjian.”

„Boekannja hamba sangadja pandeng ini terlaloe sedikit,” katanja si „Tjelengan-botjor”, „tetapi sebenernja boeat menjoeap sadja dia-poenja orang-orang, dikoeatir ini djoembla masih tiada tjoekoep.”

„Tjoba pikir, Loja,” Siauw Leng Kan toeroet berkata, „brapakah besar harganja satoe lowongan Tie-koan? Dan ini hari Loja kasiken djoembla jang koerang, itoe masih tiada kenapa, tetapi sebaliknya djikaloe lantaran ini nanti timboel soeatoe perobahan, Loja tiada aken bisa persalaken padanja.”

Si „njepit tiga” mendjadi apabolehboeat masoek kombali di dalem dan bawa kaloeear satoe boengkoesan potongan mas, besar-ketjil kira-kira ada doeapoeloe potong dan ia berkata pada Oh Ko:

„Dengen ini semoea didjadiken oewang

perak, tiada bakal lebi bawah dari djoembla anem atawa toedjoe-riboe, mendjadi dengen oewang jang baroesan, tjoekoeplah sepoeloe-riboe."

Siauw Leng Kan menjamboet itoe semoea dan balik serahken lagi pada Oh Ko, jang sesoedanja menerima betoel sigra djoega doea orang itoe hendak berpamitan, tetapi lekas djoega Tie-koan telah berkata:

„Menilik dari sini, tentoenja ini perkedaän moesti berhasil! Apabila kemoedian si Koepoe-koepoe poeti dapet dibinasaken, sebisabisakoe nanti poedjiken Dji-wie ka pembesar atas, jang sedikitnja tentoe bakal dapetken seroëpa kedoedoekan lebi baek daripada sekarang ini. Dari itoe ini hari akoe ingin mengangkat soedara dengen Dji-wie berdoeä, tiadakah baek begitoe?"

„Inilah hamba tiada brani dan djoega tiada koeat boeat menerima," berkata doea orang itoe dengen soeara ampir berbareng.

Tie-koan ketawa besar dan kemoedian berkata:

„Si Koepoe-koepoe poeti teritoeng pesakit negri, djikaloe sampe dapet ditangkep, boekan sadja Oh Heng dapet banjak oewang, Kan Sam bisa terbales sakit hatinja, tapi akoe

djoega bakal terloepoet dari bintjana. Apa-poela kaloe padoeka Gouverneur soeda madoeken soerat ka hadepan sri baginda, pastilah Dji-wie poenja pahala bakal dapet koerniaän kebesaran jang sederhana."

Berbareng dengen habisnya ini oetjapan, zonder membri kesempatan boeat orang bisa berpikir, ia tarik doeä orang itoe masoek ka dalem dateng di kamar toelis.

Ia prenta orang-orangnya sediaken satoe medja perdjamoean, djoega oendang Oh Soe-ja boeat bantoe temenin tetamoena.

Apabila ampat orang itoe soeda berdoe-doek hadepin medja jang penoe dengen berbagi-bagi barang hidangan. Tie-koan lebi doeloe menjeritaken pada Ik Leng dari apa jang Oh Ko dan Siauw Leng Kan atoer boeat menangkep Koepoe-koepoe poeti. Kita poenja Soe-ja dengerin itoe tjerita dengen saben-saben manggoetin kepala dan bermesem, achirnya kemoedian njataken girangnya boeat itoe semoea pengatoean jang rapi.

Setelah medja sembahang diaatoer beres, lilin mera laloe dipasang dan tiga orang itoe dengen masing-masing memegang hio lantas berloeloet di depan medja itoe dan bersoempa sebegimana lajiknja orang mengangkat soe-

dara. Maka ternjatalah bahoea Tie-koan perna toea, kadoea Siauw Leng Kan dan Oh Ko paling ketjil.

Sesoeda bersembajang, kombali marika berdoedoek makan-minoem dengen kepoeasan jang menjenengken hati.

Sekawanan srigala dan andjing,
Dengen resia mengiket persekoetoean.
Sakoempoelan tikoes dan koetjing,
Dengen terang tidoer bersamaän.

Penjerepan gelap.

Go Tjiauw soeda dapet ditoeloeng dan poelang dengen³ slamet di pasanggrahan Hong Beng San. Koepoe-koepoe poeti laloe mengadaken pesta besar, mengoendjoek girang hati dan menjénengken sekalian orang-orang gaga jang soeda berkerdja tjape.

Dalem koet ka maña, oleh kerna meliat Ie Jan Kheng ampoenja lengan-tangan mendapet loeka oleh pana-peloeroe dan itoe ada lantaran membela dirinja, maka djoega sebagai mengoetjapken trima kasi, Go Tjiauw memegang seglas arak dan menjoegoeken di hadapan Jan Kheng itoe sambil membi² slamet.

Jan Kheng tjebet berdiri dari tempat doe² doeknya dan mendjoera dengan hormat seraja katanja:

„Membikin Tji-hoe tamba bersengsara dari membikin Tji-tji memikoel kekoeatiran besar, adalah semoea akoe saorang ampoenja dosa. Merasa maloe sama kealpaän sendiri masih tiada sempet, moestail brani trima itoe pengoetjapan soekoer. Aken tetapi, Tji-hoe ampoenja sapoetangan masih

Baroe sadja bitjara sampe disini, mendadak lehernja seperti terkantjing, dikedoea pipinja

berbajang warna semoe-mera.

Koepoe-koepoe poeti tjoema mengira ini perobahan ada tersoeroeng oleh pengrasaän maloe-hati dan sama sekali ia tiada mendoega kaloe dalem hati orang ada mangan-doeng seroepa pengrasaän jang tiada gampang dioetaraken.

„Moaij poenja perkataän ini,” menghiboer dia dengen soeara lemah-lemboet, „sesoenggoenja membikin akoe tiada bisa merasa seneng. Pada koetika Go Long tertahan dalem lobang tana, djikaloe boekan Moaij telah melawan moesoe di moeloet trowongan dan memboeka djalan kaloear, Go Long belon tentoe bisa terloepoet dari itoe pengantjeman. Maka itoe boeat ini kali soeda bisa menoeloeng kaloear Go Long, teritoenglah Moaij jang haroes mendapat gandjaran pertama; Pek Siauw dan Bwe Eng, Tho Eng, Kwi Eng, Lan Eng haroes tertjatet kadoea, sedeng Gak Peng dan laen-laennja poela adalah teritoeng katiga. Kawankawankoe sekalian, begimana kaoeorang pikir boeat ini pertimbangan?”

„Kapitein poenja pertimbangan ada dji-toe dan tjotjok dengen pikirankoe,” berkata Gak Peng dengen ketawa goembira, „semoea,

tjoekoep adil! Aken tetapi, akoe pikir itoe pembesar andjing kita soeda berlakoe enteng membebaskan djiwanja dan dikoeatir dia moesti menerbitken ombak poela serta bersatroe teroes-teroesan i dengan Kapitein, maoepoen menggerakken balalentara besar dateng menjerang kitapoenja pasanggrahan."

Gak Peng dan laen-laennja orang keliatan tiada bersoeara, aken tetapi dari roepanja ternjata marika semoea merasa moefakat sekali dengan perkataannja Pek Siauw itoe.

„Inilah soeda tiada bisa disangkal lagi," membenerken Go Tjiauw, „tetapi prihal Siauw Leng Kan jang maskipoen diapoena resia boesoek soeda ketaoean, toch napsoe boeat membales sakit hati tiada sekedjap bisa dilooepaken olehnja dan barang tentoe dia moesti pergi lagi boeat memboedjoek Oh Ko, inilah ada satoe soeal jang penting boeat dipikir oleh kitaorang."

„Apa jang Long Koen koeatirken, meresep betoel dengan pikirankoe," katanja Koe-poe-koepoe poeti dengan bersenjoem, „tetapi sekarang kawan-kawan kita jang masih tjape, perloe mengaso satoe atawa doea ha-

ri. Sesoeda itoe, akoe minta Pek Siauw dengan merjaroe masoek ka dalem kota boeat melakoeken penjerepan, apabila kita soeda dapet sedikit kabaran jang beroena boeat kita, baroelah dipikir dan berdame tjara begimana kitaorang hāroes berkerdja lebi djaoe."

„Tjape? itoelah sama sekali akoe tiada merasa!“ Berkata Pek Siauw: „Besok djoega akoe boleh sigra masoek dalem kota boeat menjerepin.“

„Toenggoe doeloe!“ berkata lagi Gak Peng, „takdir Toehan, Go Ja dengan Kapitein dapet menetepken perdjodoan bagoes. Tidakah ada paling baek lebi doeloe dilangsoengken ini perkawinan, kemoedian baroe mengeroes laen-laen perkara?“

Aer-moekanja si Koepoe-koepoe poeti mendadak djadi beroba dan ia berkata dengan soeara angker:

„Gak Eng Hiong soeda mabok! Telah njata akoe dengen Go Long soeda mempoenjain ketetapan dalem hal perdjodoan ini, toch tiada perloe moesti bèreboetan aken tempo pagi dan sore. Apapoela antjeman moesoe sedengnja heibat dan tipoe-daja kedji lagi mengiterin di sekiter kita.

Dan apakah tempo begitce wadjib dibilitjarken prihal perkawinan? Sedeng sekalipoen ada begitoe perloe aken membitjataken itoe oeroesan, masakah moesti dengen setjara kesoesoe?"

Gak Peng mendapat dampratan begitoe roepa, merasa maloe hati sendiri, tinggal menoendoekin kepala zonder bisa mengoetiapken barang sepata perkataän poela.

Besok hari, Pek Siauw laloe toeroen dasi goenoeng, dengen menjaroe seperti satoe toekang siang-mia, tangan mendjindjing satoe doelang kajoe, jang dalemnya terletak prabot-toelis, berserta bebrapa matjem barang jang biasa terpake oleh toekang Siang-mia goena perkerdjaännja, sedeng di moeka doelang itoe ada teroekir doea hoeroef jang berarti: „memboeka resia", laloe berlenggang dan berlangka jang dibikin-bikin berdjalan menoedjoe ka kota Tek Tjoe.

Apabila soeda masoek ka pintoe timoer, ia dapet liat satoe waroeng thee jang ketjil, dalem mana ada berdoedoek tiada kerroean roepa brapa orang prempoean dan lelaki, masing-masing memake pakean berkaboeng, lagi saling beromong-omong satoe sama laen dengen berbisik, setaoelah

apa jang marika itoe lagi asik membitjara-
ken.

Di sampingnya mana, terdapat lagi sa-
orang prempoean, beroesia di antara delat-
pan dan sembilanblas taon, parasnya tiada
terlaloe cilok tetapi tjoekkoep manis dan me-
narik hati. Alisnya koesoet dan matanya me-
ngembang aer, mirip orang jang sedeng
menanggoeng saroepa kesoekeran dan ke-
sengsaraän hati jang tiada terkata beratnja.

Pek Siauw laloe berdjalan masoek ka itoe
waroeng bersama ia-poenja doelang Siang-
mia, membikin reclame dan menjeboet de-
ngen lantjar ini perkataän:

„Petangan Boen Ong jang moestadjeb!
Siapa-siapa jang ketemoeken perkara soeker
dan masih dalem kesangsian, marilah tjoba!“

Baoe habis ia berdendang, koenjoeng-
koenjoeng satoe prempoean toea menggape
padanja dengen tangan jang disertaken lagi
dengen perkataän:

„Kebetoelan sekali! Eh, Sianseng, mari
sini, toeloeng akoe tjoba petangin satoe
perkara.“

Lekas sekali Pek Siauw letakin iapoenja
doelang di atas medja, sambil mengambil
saboeah taboeng dan gontjangin beroen-

toen tiga kali, sambil mengawasin potongan bamboe jang kaloear dari dalem taboeng itoe, ja menanja:

„Tentang perkara apakah jang hendak diminta pentangan?“

„Perkara djodo,“ saoetnja si prempoean toea.

Dengen pietnja Pek Siauw belaga bikin bebrapa goeratan dan menggoleng-goleng kepalanja sambil berkata :

„Perkara djodo itoe, menoeroet petangan-koe jang terdapat dari sini, maskipoen bisa sekali kedjadian. Aken tetapi sebab ada soeatoe rintangan, maka moesti seliwatnja Pek-gwee Tiong Tjhioe baroelah itoe pergaboengan bisa sampoerna dilangsoengken.“

Si prempoean toea mendjadi bingoeng terlongong-longong sampe sesaat lamanja, sedeng laen-laen orang jang berada di sitoe, rata-rata pada dateng keroeboengin kitaipoenja toekang Siang-mia tetiron, seraja menanja dengen soeara ampir berbareng :

„Sianseng, apa sebab moesti ditoenggoe sampe seliwatnja Tiong Tjhioe?“

Pek Siauw menoendjoek pada bekas goeratan di atas potongan bamboe itoe, sambil membilang :

„Ini hari djato tanggal Tjhit-gwee Tjap-kauw, bintang apes sedeng bermaharadja-lela, sebaliknya djikaloe sampe di harian Tiong Tjhioe, semoea keapesan terganti dengan keberoentoengan, hingga sama sekali mendjadi tiada ada rintangan poela.“

Mendenger ini perkataän, semoea orang itoe djadi saling berbisik aken satoe dan laen, kemoedian katanja :

„Roepanja ini Sianseng ampoenja petangan poen djitoe sekali. Tetapi di sini boekan ada tempat jang sampoerna boeat bertjakepan, tiadakah ada lebi baek kita mengadjak Sianseng dateng di roema, agar soepaja dia bisa tjoba memetangin lebi djaoe. Dan Tjoe Lo Thaiij, begimana kaoe pikir ?“

„Djoestroe akoepoen mempoenjain ini pikiran,“ katanja si prempoean toea.

Tetep begitoe, laloe djoega marika mengadjak Pek Siauw bersama kaloeear dari dalem waroeng thee terseboet dan berdjalan membiloek bebrapa biloekan, achna marika sampe di soeatoe gang, jang pada depan pintoenza soeatoe roema ada tergantoeng saboeah bendera poeti dan di mana djoega ada tertoe lis perkataän : „Hauw

Tjoe, Tjoe Piauw, jalah namanja anak dari orang jang mati, sedeng di laen bagian dibikin sedikit tjetetan tentang penanggalan meninggalnya iapoenna ajah si-anoe, dari sebab terboenoe mati oleh kawanan begal dengen setjara amat kedjem, enz. enz.

Setelah meliat begitoe, dalem hatinja Pek Siauw djadi berpikir :

„Oh, oh, tiadakah ini ada roemanja Tjoe Siauw Kauw? Ja, akoe moesti bisa berlakoe ati-ati di sini.“

Dan bener djoega itoe prempoean toea telah mengadjak aken Pek Siauw berdjalan masoek ka dalem roema itoe, jang diikoet djoega oleh itoe prempoean moeda serta laen-laennja orang. Di dalem Pek Siauw disilaken berdoedoek di pertengahan roema, sedeng itoe prempoean moeda adalah teroes masoek ka blakang.

Sesoeda itoe, si prempoean toea laloe moelai berkata pada Pek Siauw dengen soeara pelahan :

„Sianseng, akoe sekarang toetoerken padamoe hal-hal jang bener. Anakkoe jang soeda mati, jalah sebenernja binasa oleh kerna diboenoe kawanan penjamoen, sedeng akoe-poenna mantoe prempoean masih beroesia

amat maoeda dan berparas tjantik djoega, maka itoe ada satoe Oh Taij-ja jang soeda liat penoedjoe padanja, soeka mengeloearken oewang limaratoes tael perak, boeat ambil mantoekoe sebagi goendik. Aken tetapi, mantoekoe tiada soeka menerima, sedeng si djomblang jang mendjadi orang perantaraän dalem ini oeroesan masi selaloe tjoba djoega aken menjampeken maksoednja, serta membilang bahoea itoe satoe Oh Taij-ja, dalem tempo tiada seberapa lama poela pasti bisa naek mendjadi Loja, lagipoen dalem tanganja ada mempoenjain banjak oewang, soenggoe sajang sekali djikaloe ini tempo bagoes moesti diliwatken dengen pertjoema. Ini sebab membikin akoe selaloe bersangsi-sangsi dan belon bisa mengambil poetoesan begimana jang baek. Sekarang akoe berroentoeng bisa berdjoempa dengen Sianseng, hareplah lagi sakali Sianseng soeka toeloeng petangin lebi djaoe dan lebi teliti ; kemoe-dian akoe tentoe mengasi persen kaoe 200 Tjhie."

Pek Siauw sekarang mengarti bahoea se-soenggoenja ini roema tiada kliroe lagi tentoe ada roemanja Tjoe Siauw Kauw. Laloe kemoe-dian ia menggontjang lagi itoe taboeng

dan poera-poera menggoerat-goerat pergi-dateng dan mengitoeng-itoeng sampe sedjoe-roes lamanja dan tiba-tiba ia djadi ketawa, sambil katanja :

„Ha ! ha ! Bagoes sekali ! Ini perdjodoan bakal mendjadi amat kekel dan beroentoeng. sekalipoen bener di antara itoe ada tersangkoet soeatoe keapesan, tetapi kemoedian masih bisa dipoenaken oleh saroepa kemoedjoeran, jang meroba keapesan mendjadi keberoentoengan. Tjoemalah haroes djangan diloepa satoe hal jang teramat penting, jaitoe ini perkawinan haroes dilangsoengken sesoeda liwat Tiong Tjhioe, baroe bisa mendjadi makmoer dan slamet betoel-betoel.“

Baroe habis Pek Siauw mengoetjapken ini perkataän, kedengeran satoe orang telah berkata dengen ketawa :

„Ja, ja, asal sadja ini perdjodoan bisa ke-djadian, kendatipoen moesti terlambat sampe bebrapa hari, itoepoen boekan mendjadi satoe halangan besar. Oh, ini Siansang am-poenja perbilangan, sesoenggoenja ada pantes sekali !“

Prempoean toea itoe poen mendjadi ber-girang dan bersoekatjita, lantas mengasi persen pada Pek Siauw djoembla sebegimana

lebi doeloe telah mendjandijken; laen dari itoe ia djoega hendak menahan Pek Siauw tinggal makan di roemanja. Tetapi Pek Siauw menampik itoe adjakan dengan oetjapken trima-kasi, laloe kemoedian berpaimitan denqen semoea orang jang berada di sitoe, serta berlaloe dari roema terseboet.

Ia tiada teroes balik poelang ka goenoeng, kerna ia bakal menginep satoe malem dalam kota boeat menjerepin kabar-kabar lebi djaoe.

Di sepandjang djalan aken menoedjoe ka roema penginepan, Pek Siauw mendapet denger orang membilang : Bahoea San Tong ampoenja Gouverneur, telah mendjandijken premie besar kapada siapa jang bisa menangkep kepala penjamoen Koepoe-koepoe poeti, sedeng Kolonel dari ini kota poen telah bersedia aken mengoempoel balatentara besar boeat membasmi itoe kawanan.

Sesampenja di Hotel, atawa pada sesoeda doedoek makan malem, ia mendapet denger poela sala satoe penoempang laen telah berkata pada temennja :

„Pada ampat-lima hari berselang akoe dateng dari Tjeng Kang kemari, di sana poen soeda terdjadi soeatoe hal loear-biasa.

Lantaran didakwa oleh diapoena Ie Thaij-thaij di hadepan Tjeng Ho Koan, maka Ong Pat Taijdjin sampe terloetjoet dari kebesaranja."

"Oh, roepanja kaoe masih belon mengetahoei," demikian kedengeran saorang laen telah berkata dengan soeara pelahan: „Inilah ada dari sebab perkara djina. Sebegimana akoe denger, itoe Ong Taijdjin sebenarnya ada bikin perhoeboengan gelap dengan Thaij-thaij dari kitapoena Tie-koan Loja."

Mendenger itoe perbilangan, dalem hatinya Pek Siauw diam-diam merasa geli saorang diri. Sedeng lebi dari itoe ia tiada denger ada laen perkataän poela, langsoeng iapoen naek ka pembaringan teroes tidoer poeles sampe esok paginja, baroelah ia bangoen dan berpakean beres serta membajar ongkos kamar, laloe balik poelang ka goenoeng Hong Beng San.

Maka orang djanganlah mengira.
Dalem kamar leloeasa bitjara.
Oleh kerna atjapkali kentara,
Koeping orang senantiasa terpliara.

Permoefakatan pinda.

Sjahdan Pek Siauw sesampenja di pasang-grahan goenoeng, laloe djoega ia menjeritaken pada si Koepoe-koepoe poeti dan laen-laennja orang tjara begimana di roemanja Tjoe Siauw Kauw ia soeda bikin pertangan, serta laen-laennja dari apa jang ia soeda dapet serepin.

„Itoe jang diseboet Oh Thaïj-ja, tiada bisa sala lagi moesti ada akoepoenja Koko, Oh Ko,” katanja Koepoe-koepoe poeti setelah berpikir sedjoeroes lamanja: „Dia, sebegimana akoe taoe, ada saorang miskin, begimana bisa mempoenjain oewang aken mengambil bini-moeda dan lagi tjara begimana dia aken bisa lekas mendjadi Loja. Inilah ada djalan-djalan aken kita bisa mendoega-doega resia apa jang tersemboenji di dalem itoe. Ach, tiadapoen heran pada itoe hari dia dateng koendjoengin akoe, sengadja soeda oetaraken tentang hal apa jang Siauw Leng Kan telah minta dia lakoeken; sedeng sebenernja dengen berboeat begitoe, jalah dia hendak memantjing akoe boeat bisaterdjeroemoes dalem tipoenja.“

„Sedeng lebi doeloe, delapan-sembilan ba-gian akoepoen telah bersangsi aken mak-

soednja itoe," demikian Koepoe-koepoe poeti meneroesken perkataännja: „dari itoe, akoe telah berniat goenaken tipoe membales tipoe, mengandjoer boeat dia bisa dateng di sini membantoe akoe sebagai mengepalakan pernikahankoe dan kemoedian pertama-tama kita boleh bikin linjap marikapoenja bantoean dalem, laloe mengatoer tipoe boeat mengasi bagian pada itoe kawanan pembesar-pembesar seraka dan pegawe politie jang kedji."

Go Tjiauw menepok tangan sambil ber-kata dengen goembira:

„Kapitein ampoenja perbilangan dan pikiran, sesoenggoenja tjotjok dengen penda-petankoe.”

„Tetapi,” tanja si tjantik dengen girang, „tentoenja Long Koen djoega soeda pikir daja apa jang kita haroes lakoeken?”

„Kedatengannja Leng Heng kemari, bisa dipastiken boekan tjoema sendirian, barang tentoe di antara itoe moesti ada berikoet orang jang mempoenjain kebisaän, jang djikaloe tiada maoe dibilang terlaloe tinggi sebaliknya poen tiada terlaloe renda. Apalagi setelah pembesar atas mengeloearken premie besar, njatalah djoega hal ini möesti

soeda sampe di hadepan baginda keizer. Ini sebab boekan sadja orang soeda membeli Leng Heng selakoe bantoean sebla dalem, tapi djoega barisan besar dari Tek Tjioe pasti ikoet kaloear dan bersemboenji di se-pandjang djalan, jang nanti menerdjang dari loear. Dalem anggepan marika, dengen ber-boeat begitoe, kita semoea bakal terdjarung habis dengen satoe kali lepas. Seandenja bi-la kita moesti melawan dengen tenaga, itoe-lah bakal menjoekerken bagi kitapoena djoembla kawanan jang tiada terlaloe besar; oleh kerna djikaloe sampe kedjadian ini ma-tjem perklaian moesti berdjalan lama, nis-tjajalah barisan besar dari negri bisa di-panggil dateng boeat mengoeroeng ini goe-noeng, demikian kita mendjadi terantjem dan moesti alamin berbagi-bagi ketjilakaän! Da-lem atoeran mendjalanken tentara ada me-njeboet: „Mendjaga itoe, seoepama gadis jang terkoeroeng; sedeng berlaloe itoe, jalah mirip kantjil jang liar.“ Maka apabila ini kali kita bisa moendoerken moesoe, ini tempat pasti boekan mendjadi poela soeatoe kediaman jang sentosa bagi kitapoena perkoempoelan.“

Si Koepoe-koepoe poeti tinggai bingoeng

sekoetika lama dan keinoedian dengen mang-goetin kepalanja, ia berkata :

„Long Koen ampoenja pikiran jang dalem dan kekoeatiran jang djaoe, semoea ada masoek di akal ! Aken tetapi, djikaloe moesti meninggalken ini tempat, ka mana lagi kita-orang moesti pergi ?“

„Dari dalem lobang naga dan moeloet matjan, doea kali akoe soeda mendapat Kapitein ampoenja pertoeloengan, soenggoe membikin akoe moesti bersoekhoer dan bertrima-kasi banjak-banjak, apa-kata-lagi telah tetep bakal mendjadi soeami-istri, mendjadi semoea apa akoe tiada aken bisa loepaken. Roemakoe berada di Tjin Tek Koan, berdampingan dengen telaga Thajj Ouw, sedeng liwat dari Thajj Ouw, terdapat satoe goenoeng Ko Dji San jang bisa menemboes ka laoetan dan tana-tana poelo. Itoelah ada soeatoe keindahan dari Natuur ; dan akoe pikir hendak pergi ka sana, berdiriken satoe keradjaän baroe. Demikian mendjadi tiada ketjiwa boeat achir-pengidoepan dari orang-orang gaga !“

Dengan berlompat-lompat kegirangan, Gak Peng berkata :

„Ja, ja, kita semoea haroes pergi ! Barang

siapa jang tiada soeka ikoet, dia tentoe lebi
doeloe rasaken kepelankoe!"

„Pergi, ja, pergi," membentak Koepoe-
koepoe poeti dengen ketawa, „aken tetapi,
djangan sembarang mengotje dan bikin ri-
boet!"

„Di satoe bagian kitaorang boleh belaga
rajaken itoe pesta perkawinan," demikian Go
Tjiauw berkata poela, „aken menipoe boeat
marika itoe dateng di kitapoenja pasanggrahan,
sedeng di laen bagian adalah dengen diam-
diam kita moesti memberesken segala barang-
barang dan segala apa jang perloe dibawa,
agar di wakoe kitaorang aken brangkat
pinda tiada sampe mendjadi terlaloe kesoesoe.
Aken tetapi, ini perkara kita moesti pegang
resia betoel-betoel, tiada sekali-kali boleh
diketahoei laen orāng. Dan djoega sekarang,
moesti dititah bebrapa kawan-kawan toeroen
ka goenoeng dan sengadja oewarken kabar
di mana-mana tempat jang berdamping de-
njen membilang bahoea Kapitein dari goe-
noeng Hong Beng San telah tetep nanti
menikah pada tanggal Pek-gwee Tiong
Tjhioe. Laen dari itoe, di loear dan dalem
dari pasanggrahan kitaorang moesti atoer
membikin gerbang dan padjang dengen kem-

bangsan serta kaen-kaen mera, seperti mirip betoel orang jang lagi hendak merajaken pesta kawin. Dengan begitoe, djikaloe marika mendapet taoe aken ini semoea, pastilah iaorang bakal menjerang pada kita sewaktoe kita di sini tiada bersedia. Sampe di itoe tempo, atawa kita mentjari kemenganan dengen tipoedaja, itoelah semoea boleh dikerdjaken dengen meliat glagat."

Koepoe-koepoe poeti dan laen-laen orang rata-rata moefakat dengen pikirannja Go Tjiauw itoe, maka djoega laloe berbareng dilakoeken sebegimana diatoer.

Bener djoega koetika ini kabar soeda sampe dalem kota Tek Tjioe, tiada perdoeli waktoe malem, Siauw Leng Kan soeda lantas mengoendang Oh Ko, soeami-istri, bersama dateng mengadep Kolonel dan Tiekoan, serta saling bermoefakatan tjara begimana jang baek.

„Inilah ada soeatoe tempo jang bagoes!“ katanja sang kolonel, „sewaktoe marika repot dengen oeroesan pernikahan, tentoe djoega marika tiada membikin persediaän apa-apa, djikaloe kita lantas menggerakin balatentara boeat pergi menerdjang pasang-grahannja, brangkali marika semoea bisa

dibikin bersi dan dengen begitoe kita djadi bisa membales sakit hati dan kehinaän tempo bari."

"Aken tetapi, Taij-djin, kita tiada boleh pandeng begitoa enteng," berkata Siauw Leng Kan, „haroeslah dipikir bahoea si Koepoe-koepoe poeti itoe, boekan sadja mempoenjain ilmoe perang dan ilmoe silat jang amat bagoes, tapi djoega ia terkenal amat tjerdkik, banjak poenja akal-akal jang tiada dapet didoega lebi doeloe. Ini sebab, belon bisa ditentoeken apa di itoe waktoe, dengen djalan gelap dia tiada mengatoer persediaän jang sampoerna. Dari itoe menoeroet hamba poenja pikiran, perloe sekali oendang dateng „Permadani poeti“ aken menjaroe pakean prempoean hoeat mengikoet Oh So-so bersama masoek di pasanggrahan Hong Beng San, sebagi satoe pembantoe jang berkerdja di bagian dalem boet berdaja menjilakaken si Koepoe-koepoe poeti. Djikaloe si Koepoe-koepoe poeti dapet terdjebak, kawanan penjamoen jang laennja kita boleh traoesa takoetin poela."

Mendenger itoe perkataän, sang Tie Koan beroepa amat girang dan dengen soeara mengalem laloe berkata :

„Pikiran begini, soenggoe lebi daripada bagoes! Dan sekarang bolehlah kira mene-
tepken begini: Boeat oeroesan di dalem pa-
sanggrahan penjamoen, haroes dipikoel oleh
Oh Ko, soeami-istri bersama „Permadani
poeti”; dan boeat oeroesan mengatoer bala-
tentara semboenji di sepandjang djalan haroes
tersera pada Lie Kan Sam; sedeng boeat
barisan blakang atawa tentara pembantoe,
bolehlah akoe bersama Tjham Tjiang
Taijdjin jang mengepalaken. Dan semoea-
nja moesti berkoempoel di bawah kaki
goenoeng Hong Beng San, di waktoelohor
dari harian Tiong Tjhioe. Oh, boeat ini
saroepa gerakan kita moesti bisa berlakoe
ati-ati, goena keoentoengan dan keslametan
diri masing-masing !“

Sang Kolonel setelah mendenger ini per-
kataän, bertepok-tepok oendjoekin goem-
biranja hati dan berkata kemoedian :

„Berkerdja dengen terpentjar tetapi semoea
boeat goena satoe oedjoed, itoelah pasti
menerbitken kesampoernaän dalem perker-
djaän! Ja, In Ong ini kali ampoenja penga-
toeran jang bagoes, bisa diharep kitapoenja
kehinaän itoe hari bakal tertjoetji bersi !“

Sekalipoen orang Tjin,
Poenja banjak akal litjin;
Tetapi toch negri Tjien,
Tiadalah kekoerangan Bo Sin.

Belaga kawin.

Sampe di awalnja boelan delapan. Di goenoeng Hong Beng San, loear dan dalem, antero keliatan seperti baroe, kerna sana-sini soeda pada dibikin padjangan. Kamar penganten diatoer di blakang pasanggrahan pada seboeah gedong sebla kanan; ini gedong memblakangin goenoeng dan mengadepin aer, tempatnya soenji dan njaman.

Adapoen si Koepoe-koepoe poeti dan Go Tjiauw, jang sesoedanja bersama mengalamin itoe berbagi-bagi kesoekeran dan kesengsaraän, tiadalah heran mərika djadi saling mengesianin aken satoe dan laen, atawa saling menjinta dengen soetji, begitoe sedep keliatannja. Aken tetapi, marika senantiasa berlakoe sopan-santoen, sama sekali tiada mempoenjain itoe matjem napsoe dan keinginan sebegimana kebanjakan lelaki dan prempoean moeda di ini djeman.

Di soeatoe hari, sedeng marika saling beromong berdoea-doeaän dengen asik, koenoeng-koenjoeng Go Tjiauw tiada sengadja telah membitjaraken prihal si „Permadani poeti“ ada saorang moeda jang mempoenjain kebisaän bagoes djoega beroman tjakep,

hingga berbeda djaoe dengen sebagian anak-anak moeda; aken tetapi katanja. soenggoe terlaloe ketjiwa bahoea dia itoe soeda teritoeng satoe moesoe dan seande boekan begitoe, tentoelah bisa mendjadi soeatoe pasangan jang amat sembabat dengen Jan Kheng.

Koepoe-koepoe poeti bermesem sewaktoe Go Tjiauw bertjakepan tentang ini hal dan kemoedian dengen geli ia berkata!

„Menoeroet Long Koen ampoenja pengliatan, njatalah itoe orang sebagi boleh terpake. Aken tetapi sebaliknya boeat pengliatankoe, orang itoe bener beroman tjakep tetapi tiada loeroes, tindakannya betoel gesit tetapi tiada tanggoe. Ini semoea mengoendjoek bahoea dia itoe tiada lebi seperti satoe ekor koembang diantara boenga-boenga. Di biakang hari bakal bisa diramalken dia tentoe terbinasa dalem tangan atawa lantaran orang prempoean !”

Sedeng marika lagi bertjakepan begitoe, keliatanlah ie Jan Kheng djoestroe mendatengin dengan tindakan satoe-satoe, sedeng dari parsnja jang keliatan lesoe, menandakan bahoea ia ini lagi menanggoeng saroepa pikiran doeka dan seperti ada apa-apa jang

soeker sedeng menindi pada senoebari dan hatinja.

Apabila Jan Kheng dateng deket, Koepoe-koepoe poeti laloe silaken berdoedoek, seraja katanja:

„Dalem bebrapa hari ini Moaij ampoenja paras keliatan koerang bertjahaja, tiadakah lantaran setempo menoeloeng Go Long. Moaij perna mendapet keroesakan atawa loeka pada bagian anggota maoepoen toeboeh ?”

„Itoelah tiada perna dirasaken olehkoe !” saoetnja Jan Kheng sambil mengela napas pandjang. „tjoemalah jang dipikirken olehkoe, jalah itoe voorstel dari Go Long boeat pemindahan ka goenoeng Ko Dji San, oleh kerna seande iboekoe tiada soeka idzinken Moaij boleh ikoet pergi, hingga tiada bisa disangkal lagi Moaij tentoe aken selamanja diserang oleh penjakit rindoeün Tjitji jang manis.”

Sehabisnya mengoetjapken ini perkataän, aer-matanja djato berlinang-linang ka bawah, pikirnja aken rogo kaloeär dari sakoe badjoenja, sapoetangan poenjanja sendiri boeat menjeka aer-mata, tetapi tiada njana Go Tjiauw ampoenja sapoetangan jang sekean

lama ada tersimpen olehnja, sewaktoe ia
dapat poengoet koetika menoeloeng Go
Tjiauw dan sekarang itoe sapoetangan soe-
da dikaloearken dengen tiada sengadja. Apa-
bila ia merasa aken itoe kekliroean dan
hendak semboeniken poela sapoetangan ter-
seboet, adalah soeda kasep serta tiada ke-
boeroe lagi. Langsoeng kedoea pipinja dalem
saät itoe berbajang waina mera.

Koepoe-koepoe poeti jang bermata tjeli,
lekas sekali dapat liat itoe semoea, samen-
tara dalem hatinja sigra djoega dapatken
soeatoe kesedaran dan boeroe-boeroe ia ber-
kata dengen ketawa:

„Oh, antara Moaij dan akoe, doe-a-doea
teritoeng sebagai pendekar prempoean, maka
itoe perloe apa moesti meniroe itoe perboe-
atan dan itoe kebiasaan sebegimana kebanjak-
an anak-anak prempoean. Gie Tji poen soeda
lama mempoenjain ini niatan aken merang-
kep Moaij boeat bersama-sama persoeami-
ken Go Long saorang, mengambil tjonto
seperti prilakoenja Eng dan Hong di doe-
loekala. Dan soekoer sekali jang Moaij djoeg-
ga ada mengandoeng ini oedjoed, hingga
akoe boleh traoesa berkerdja lebi banjak, ha-
nja melaenken perloe membri tae di ha-

depan Ie-bo, laloe ini perangkepan dibikin-ken ketetepannja."

Begitoe habis berkata, begitoe djoega Koepoe-koepoe poeti menitah Lian Eng dan Kwi Eng aken pergi oendang Ie Hoedjin dateng di loear, serta kemoedian mintaken Jan Kheng boeat diperdjodoken djoega pada Go Tjiauw.

Ie Hoedjin djoega merasa sajang pada Go Tjiauw, satoe anak moeda jang, bero-
man tjakep dan angker, lagipoen meliat anak
prempoeannja tinggal kemaloe-maloean di
samping dengen tida oetjapken barang separa
perkataän, lekas djoega ia mengarti bahoea
si gadis poen soeda njataken seneng dan
setoedjoe dalem hatinja. Dengan adanja ini
beberapa sebab, soeda tentoe Ie Hoedjin ti-
ada dapet djalan atawa sebab boeat me-
nampik permintaännja Koepoe-koepoe poeti,
malahan dengen bergenombira ia membriken
itoe idzin.

Si Koepoe-koepoe poeti mendjadi amat
girang dan berpaling kapada Go Tjiauw,
ia berkata:

„Oh, sesoenggoenja Long Koen ada sa-
orang moedjoer, jang soeda beroentoeng bisa
mendapetken ini!“

Sesoedanja berkata begitoe, dengen lekas Koepoe-koepoe poeti menitah orang-orangnya menjediaken medja perdjamoean dan membikin pesta boeat keslametan dan kehormatannya Ie Jan Kheng bertoenanngan dengen Go Tjiawu; sedeng pada seantero pasanggrahan ada dikasi berbagi-bagi persenan.

Dalem tempo doedoek makan - minoem begitoe, si Koepoe-koepoe poeti soeda membisikin pada Jan Kheng katanja:

„Ha, aken ini soeatoe oeroesan, akoe sekarang soeda boleh seraken pada Moaij ampoenja tanggoengan.”

„Dan itoe, ada oeroesan apakah?” menanja Jan Kheng.

Lebi doeloe Koepoe - koepoe poeti laloe menoetoerken tentang halnya Oh Ko telah menerima oewang soeapan, maka itoe sekarang ia lagi berdaja aken dengen djalan gelap menjilakaken dirinja, serta laen - laen sebaginya, satoe persatoe ditjeritaken terang oleh Koepoe-koepoe poeti dan kemoedian ia menjamboeng dengen perkataän:

„Maleman Tiong Tjhioe, akoe dengen Go Long bakal poera-poera menika. Tetapi djikaloe pikir sebaliknya, bahoea orang jang menjadi penganten prempoean, tentoelah

tiada bisa merdika dan leloeasa. Ini sebab, akoe ingin minta Moaij soeka tjapeken diri boeat gantiken akoe dalem ini hal, agar soepaja dirikoe bisa bebas dan boleh mengatoer ini-itoe boeat satronin marika."

„Sesoedanja Moaij sekarang tetep mendjadi kepoenjaänja Go Long, memang djoega boeat berlakoe begitoe sama sekali tiada berhalangan." katanja Jan Kheng dengen ketawa, „aken tetapi ada soeatoe moestail, djikaloe marika tiada bisa mengenalken Tji-tji ampoenja paras moeka. Dan begimana akoe boleh menjaroë seperti Tji-tji?"

Si Koepoe-koepoe poeti djoega ikoet ketawa dan dengen sedikit djengikan, ia berkata poela :

„Ach, kaoe goblok sekali, Moaij! Satoe penganten, ja, satoe penganten prempoean sedjamaknja moesti memake kaen soelaman mera menoetoepin seantero moekanja; apalagi ini tjoema boeat tempo sebentaran aken kelaboein marika itoe ampoenja mata dan idoeng dan masakah sampe membikin Moaij tinggal begitoe dalem sepandjang hari!"

„Djikaloe tjoema boeat sebentaran," berkata lagi Jan Kheng dengen masih ketawa, „baeklah, Moaij nanti soeka melakoeken

sebagi Tji-tji poenja pengganti. Tetapi sebaliknya djika lamaän, akoe mengakoe bahoea akoe tiada biasa dengen ini segala matjem tetek-bengek jang soeda terlaloe koeno dan akoe tiada sanggoep!"

Baroe sadja ini permoeifikatan mendjadi mateng, koenjoeng-koenjoeng orang dateng merapport bahoea „Tjelengan botjor" dengen istri „Siloeman oeler poeti", membawa beberapa banjak boedak lelaki dan prempoean membekel barang-barang minoeman dan laen-laennja barang soembangan soeda dateng sampe di depan pasanggrahan.

Sigra djoega Koepoe-koepoe poeti menitah Tho Eng dan Bwe Eng mengikoet Jan Kheng boeat sama-sama melindoengin keslametannja Go Tjiauw dan itoe moesti dengen sangat ati-ati.

Laen dari itoe, dengen djalan resia Koe-poe-koepoe poeti menjampeken warta pada Gak Peng, Pek Siauw dan laen-laen orang aken mendjaga di loear, djangan idzinken saorang poen dari kawanan jang baroesan dateng boleh pergi kaloear dari pasang-grahan. Kemoedian ia sendiri dengen memake pakean pendek di dalem dan di loear pakean soelaman, membawa satoe barisan

ketjil pengikoet-pengikoet prempoean, lepas-ken bom dan menaboe tetaboëan, laloe mem-boeka pintoe besar pergi kaloeär menjam-boet dan silaken Oh Ko, soeami-istri, serta laen-laen orang masoek ka dalem.

Antara boedak-boedak prempoean jang dateng itoe, Koepoe-koepoe poeti dapetken saorang jang boekan mirip seperti orang prempoean soewadjarnja, oleh kerna ia itoe ampoenja tindakan dan langka, beda djaoe lemesnja sebegimana orang prempoean, lagipoen roman moekanja ternjata Koepoe-koepoe poeti perna dapat liat atawa kenal.

Langsoeng dalem hatiija kitapoenja gadis jang eilok itoe bisa mendoega apa-apa; tetapi dengen sorot moeka bersri-sri dan moeloet bermesem ia berkata:

„Atas Ko-ko dan So-so ampoenja keda-tengan dari tempat djaoe boeat membantoe Moaij ampoenja oeroesan pernikahan, soeng-goelah dalem hatikoe moesti merasa soekoer sekali, apapoela sekarang disoembangin lagi dengen sebegitoe banjak barang-barang anteran, njatalah ini boedi-ketjintaän bakal soeker bisa terbales olehkoe!“

„Ha, ha!“ Demikian katanja „Siloeman-oeler poeti“ dengen ketawa dibikin-bikin:

„Kaoepoenja oetjapan begitoe membikin kita berdoea merasa maloe hati sendiri. Sedeng ini tiada lebi riboean paal menganter salembar boeloe angsa, oepama entengnja pengasian tetapi oedjoed hati dari pada setoeloes-toeloesnja. Dan akoe denger, kaoepoenja Ko-ko ampoenja perbilangan, bahoea bakal socamimoe ada mempoenjain roman dan kepinteran djarang bisa dibanding dengan kebanjakan orang; maka itoe Gie So kepingin sekali aken bisa lebi doeloe bertemoe moeka padanja.“

Koepoe-koepoe poeti belaga seperti orang lagi kemaloe-maloean dan tinggal toendoek-in kepalanja dengan tiada mengeloearken barang separa perkataän.

„Kwa-djin masi belon salin pakean,“ demikian Lian Eng jang gantiken orang boeat membri penjaoctan: „tiareplah soedi me-noenggoe sedikit waktoe, jang tentoe kemoedian kaloeear dateng berdjoempa.“

„Oh, oh!“ berkata poela si „Siloeman oeler poeti“, „semoea ada orang satoe roema, satoe familie jang paling deket, perloe apa moesti memake peradatan boeat perdjoempahan. Ha, di mana kamar penganten diatoer, biarken akoe lebi doeloe pergi me-

nengok-nengok."

Berbareng dengen habisnya ini oetjapan, matanya melirik satce kali kepada itoe boedak prempoean jang sedari tadi telah menerbitken orang poenja sangkaän, sambil menitah aken ia itoe ikoet berdjalanan bersama-sama menoedjoe ka blakang.

„Akoe djoega masih belon berdjoempa dengan Moaij-thio dan kepingin aken bisa lantas bertemoe moeka," demikian Oh Ko telah tjampeer berkata, dan berpaling kapada sekalian pengikoetnya ia meneroesken poela, „kaoeorang sekalian poen boleh bersama-sama pergi rasaken itoe hawa dari kegirangan dan keboengahan!"

„Eh, eh," berkata Kwi Eng dengan tjetep, „sekarang baroe tanggal 12, masih belon sampe harian jang betoel. Sedeng Taij-ja dan Taij-nio, teritoeng ada orang satoe roema, tiada berhalangan boleh pergi ma-soek ka dalem, sebaliknya Tjoe-wie ini, biarlah soeka bersabar boeat sedikit hari lagi."

Gak Peng dan Pek Siauw lekas djoega silaken sekalian pengikoet-pengikoetnya Oh Ko dateng di roeangan loear, serta disedia-ken medja persantapan boeat mendjamoe marika itoe.

Dan „Siloeman oeler poeti“ dengen menoentoen itoe boedak prempoean berdjalan di depan, samentara Oh Ko mengikoet dari blakang; djalan liwatin bebrapa biloekan, dateng di kamar penganten. Di mana ke liatan klamboe bersoelam terdjelo ka bawah, kembang-kembangan dan palita-palita teratoer amat rapi dan indah sekali, membuatin kamar itoe seperti bertjahaja kilo-kiloan. Di dalem dan loear kamar ada berdiri menoenggoe bebrapa banjak boedak-boedak prempoean dan mirip seperti berbaris-baris.

Go Tjiauw dengen badan memake djoeba soelaman, serta aer-moeka bersri-sri dateng kaloear menjamboet dan berdjoempa dengen Oh Ko, soeami-istri, setjara peradatan jang pantes.

Setelah mengawasin roman orang sedjoe roes lamanja, „Siloeman oeler poeti“ seperti tiada sengadja mengeloearken perkataän jang dibarengin tarikan napas:

„Ach, inilah satoe anak moeda bagoes dan tjakep sekali! Seoemoer idoepkoe akoe belon perna ketemoeïn roman demikian! Oh, soenggoe besar sekali Kho-nio ampoenja redjeki, dapet berpasangan dengan poetra dewa dari kajangan!“

„Ja, ja.“ Oh Ko poen berkata, „A-moaij tiada mempoenjain orang toea lagi, maka semoea apa ada mengandel atas kitaorang poenja penilikan; baeklah kaoe djoega berdiam di ini gedong, aken gampang bisa mengatoer ini-itoe djikaloe perloe.“

Sang „Siloeman oeler poeti“ memanggoet-manggoetin kepalanja, kemoedian menoe ding pada laen kamar jang berdampingan dengen ini kamar penganten, ia berkata pada si Koepoe-koepoe poeti :

„Gie So aken berdiam di sini sadja.“

Dalem ketawa menjimpen pedang,
Adakah angkaoe mengarti ?
Perdjoegan antara sanak dan kadang,
Bakal terbit sekedjapan nanti !

Memboenoe enso.

Adapoen si Koepoe-koepoe poeti dengen dijalan resia telah memesen pada Lian Eng dan Tho Eng aken mendjaga baek-baek itoe gedong di mana kamar penganten ada terletak, teroetama haroes ditilik marika itoe ampoenja sesoeatoe pergerakan dan saben tempo moesti berada di dampingan marika, kapan ada apa-apa jang bisa menerbitken sedikit sadja ketjoerigaän hati, perloelah seleksnja dateng membri rapportan.

Koepoe-koepoe poeti sendiri setelah meninggalken ini pesenan, langsoeng ia dateng pada Go Tjiauw aken berdame tentang apa jang marika perloe mengatoer lebi djaoe. Dalem begitoe, sekoenjoeng-koenjoeng ke liatan Ie Jan Kheng poen sampe di sitoe, sambil dengen berbisik di koepingnja orang, ia berkata :

„A-tji ! adakah kaoe mendapet endoesan jang itoe boedak prempoean pengikoet Oh So-so, sebenernja ada penjamaran dari si „Permadani poeti“ ? Itoe hari, koetika akoe bertempoer dengen dia di moeloet trowongan, akoe soeda bisa kenal baek roman moekanja, dan sekarang, dengen begitoe lantjang dia telah brani masoek dalem lo-

bang matjan, inilah bisa dibilang dia sendiri terdjoenken dirinja ka dalem djaring jang terpasang !“

„Ja,“ katanja Koepoe-koepoe poeti dengen ketawa, „dari bermoela dateng akoe djoega soeda kenalin padanja ! Marika mengira dengan berdiam dalem ini gedong, bisa lebih gampang mengintip kitapoenja pergerakan, atawa menjampeken maksoednya. Sedeng sebaliknya marika brangkali tiada pikir jang akoe memangnya djoega beringin begitoe, agar soepaja kita boleh menangkep ikan di dalem koewali, zonder mengeloearken banjak ketjapean dan tenaga !“

„Memasak katjang membakar koelit !“ Go Tjiauw berkata sembari mengela napas pandjang, „sesoenggoenja ini ada soeatoe hal jang paling menjedihken hati. Aken tetapi, sesoedanja sekarang satoe sama laen teritoeng moesoe, apalah moesti dikata poela.“

Kemoedian iaorang laloe tetepken tipoe-tipoe jang bakal didjalanken pada harian kawin, sampe marika jang dateng tiada satoe orang djoega bisa meloepoetken diri.

Samentara tiga orang ini lagi asik saling berbisik-bisik, tiba-tiba kedengeran Lian Eng poenja soeara keras jang membilang :

„Ati-ati, Taij-nio ! Bagian blakang dari kamar penganten antero ada boekit-boekit jang soelit dan tiada keroean, mendjadi sama sekali tiada ada temboesannja. Apalagi di sana tiada mempoenjain pemandengan bagoes, membikin pertjoema-tjoema sadja ketjapean kaki pergi melantjong ka itoe djoerroesan !“

Apabila Koepoe-koepoe poeti mendenger ini perkataän, boeroe-boeroe ia pergi kaloear dan bener sekali tertampak „Siloeman oeler poeti“ bersama boedak prempoeannja, sedeng merambat poehoen-poehoen rotan, toeroen ka bawah dari djalan goenoeng, sembari berkata dengen ketawa :

„Akoe pikir aken pergi ka poentjak goenoeng boeat memandeng - mandeng tempat djaoe, tetapi tiada njana djalanannja begitoe soeker dan banjak batoe malang-melintang, hingga tiada bisa sampe ka atas.“

Si Koepoe-koepoe poeti djoega toeroet ketawa dan berkata :

„Ja, itoelah So-so menjapeken tenaga pertjoema, kerna disini tiada lebi hanja satoe djalan mati. Apalagi di atas itoe ada banjak sekali binatang - binatang boeas jang berkliaran; baek djoega matahari masi belon

toeroen, seande sampe waktoe malem gelap-goelita, sigra djoega binatang-binatang itoe tentoe kaloeear boeat mentjari korban manoesia."

„Siloeman oeler poeti” dan itoe boedak prempoean koetika soeda mendenger ini perkataän, iaorang keliatan beroepa seperti orang lagi ketakoetan dan dengen zonder mengoetjapken barang sepata perkataän poela marika balik poelang ka dalem gedong.



Sekedjapan sadja, harian Tiong Tjhioe atawa Pek-gwee Tjap-go soeda sampe, antero pasanggrahan goenoeng telah beroba baroe dan diriasin indah sekali, sedeng bendera-bendere berwarna berkibar di sana-sini, hawa kegirangan seoepama membrisorot sampe di oedara.

Waktoe malemnja, remboelan jang boender lebi siang soeda berada di antara poentjak goenoeng djoeroesan timoer, mementjarken sinaran terang di loear-dalem kamar penganten, hingga mirip seoepama doenia jang ditaboer perak, gilang-goemilang menjiloken mata.

Dan Koepoe-koepoe poeti jang itoe hari moesti mendjadi penganten prempoean, ten-

toe sadja tinggal mendekem dalem kamar jang indah itoe, serta tiada pantes pergi ka loearan. Maka Oh Ko bersama „Siloeman oeler poeti“ mengepalaï sekalian boedak-boedak, repot mengoeroes serta menilikin ini dan itoe.

Sesoedanja perdjamoean boeat keslametan kedoea penganten ditoetoep dengan sampaerna, laloe orang manganter Go Tjiauw masoek ka dalem kamar penganten.

Itoe tempo, Jan Kheng jang menjaroe djadi Koepoe-koepoe poeti, selebar moekanja antero ditoetoepin dengan soetra soelaman, doedoek dengan tertip dan lempeng di pinggiran randjang ; sedeng Go Tjiauw baoe sadja masoek ka dalem, berdiri di samping randjang sambil bersender dengan sempojongan sebagi orang kemasoekan banjak arak.

Bwe Eng, Tho Eng, Kwi Eng dan Lan Eng jang diwadjibken menoenggoe di sitoe, koetika mana tiada tinggal diam, atawa goenting soemboe lilin, atawa menjoegeoken thee wangi, atawa terkadang omong bisik-bisik dengan kedoea penganten itoe.

Djam doea lebi-koerang, „Siloeman oeler poeti“ menghampirin itoe ampat pengikoet

prempoean, berkata dengen ketawa manis :

„Hari poen soeda djaoe malem, pantes sekali kaoeorang lantas pergi mengaso, sedeng hari ini ada hari perangkepan jang moedjoer, biarlah djangan membikin penganten prempoean tinggal berdoedoek lebi lamia!“

Go Tjiauw tiba-tiba berdiri dengen mendadak dan berkata:

„Astaga! Begimana akoe boleh djadi begitoe pengloepa. Akoepoenja saroepa barang soeda ketinggalan di dalem gedong. Kwi Eng, kaoe boleh lekas pergi tjariken itoe barang.“

„Barang apakah itoe?“ Menanja „Siloeman oeler poeti“ dengen kesoesoe: „Biarlah akoe nanti boleh pergi tjariken!“

„Satoe toesoek-konde moetiara.“ saoetnya Go Tjiauw, „jang perloe boeat tambahan periasan penganten.“

„Oh, ja, itoelah ada soeatoe barang jang teramat penting,“ berkata „Siloeman oeler poeti“ lebi djaoe.

„Kwie Eng,“ menitah poela Go Tjiauw, „ikocetlah So-so pergi bersama-sama.“

„Itoe tiada perloe,“ menjega sang enso, „akoe sendiri bisa pergi tjari dan anter kemari.“

Sambil oetjapken ini perkataän, kakinja lekas sekali telah melangka pintoe kamar dan berlaloe, sedeng pelahan - pelahan ia telah dengerken satoe soeara batoekan, jang berbareng itoe sekoenjoeng-koenjoeng ke liatan dari atas poehoení Kwi Hoa di loear djendela, melompat toeroen saorang seperti melajang. Kwi Eng ampoenja mata jang tadjem, tjepeet djoega soeda bisa kenalken bahoea itoe orang boekan laen adanja daripada si boedak prempoean jang senantiasa berada di dampingannja „Siloeman oeler poeti“. Tetapi iapoенja pakean dan dandan tiada lagi sama sebegimana biasa ia pake waktoe siang hari.

Kepalanja terboengkoes dengen setangan item dan memake pakean pendek berwarna mera-moeda, samentara kakinja adalah memake sepasang sepatoe pendek jang ringkes. Dan apabila orang meliat aken matjemnja di itoe tempo, nistjalah sedikitnja moesti merasa geli, oleh kerna ia itoe beroepa lelaki boekan dan prempoean boekan.

Koetika baroe sadja kakinja mengindjek tana, boeroe-boeroe ia soeda menobros maseuk ka dalem gedong serta mengilang dan tiada keliatan poela.

Samentara itoe, „Siloeman oeler poeti“ keliatannja belaga mentjari-tjari itoe barang jang dibilang oleh Go Tjiauw, tetapi dengen amat gelap ia telah hampirin si „Permadani poeti,“ sambil membilang padanja dengen soeara bisikan :

„Sekarang masih belon sampe temponja dan akoe liat Go Tjhat itoe soeda mabok, tetapi si soendel masih belon salin pakeannja. Biarlah akoe tjoba pergi pisaken lebi doeloe marikapoenja pengikoet-pengikoet dan kaoe boleh bersemboenji di loear kamar penganten, denger sadja kapan akoe membri tanda soeara djeridji, langsoeng kitaorang menoeroenin tangan. Lebi doeloe memboenoë Koepoe-koepoe poeti, baroe kemoedian membinasaken Go Tjiauw. Tentang oercesan di bagian loear, soeda tentoe telah diautor beres oleh „Tjelengan botjor.“ Hanja kita moesti djangan loepa, sesoeda melakoeken ini perkerdjaän, haroeslah njalaken api dalem kamar penganten, agar soepaja bisa dibri tanda boeat menghimpoen dan memanggil dateng balatentara jang bersemboenji di loear pasanggrahan.“

Pertjakepan resia antara kedoea orang itoe, di loear doegaän telah dapet didenger

antero oleh si koepoe-Koepoe poeti, jang koetika itoe menjemboeniken dirinja di tempat gelap, satoe persatoe kedengeran teges sekali, boeroe-boeroe dengen kaki berdjingke sebagi terbang menoedjoe masoek ka dalem kamar penganten, menitah aken itoe ampat pengikoet prempoean melindoengin Go Tjiauw boeat berdiam dalem kamarnja Ie Hoedjin. Kemoedian Jan Kheng laloe dipesen aken berdiam di atas randjang jang klamboenja ditoeroenken ka bawah, sedeng ia sendiri adalah ambil tempat semboenji di blakang randjang dan pintoe hanja dirapetin sadja, aken bisa memandeng begimana satroenja ampoenja pergerakan.

Berselang sesaat kemoedian, kedengeranlah „Siloeman oeler poeti“ dari sepandjang djalan sambil ketawa-ketawa sambil berkata:

„Soeda ditjari biar begimana djoega, en toch toesoek-konde tiada koenjoeng kete-moe, boleh djadi Kwa-djin ada loepa di mana taronja.“

Sampe di depan pintoe, tiba-tiba ia djadi menarik napas, seraja berkata dengen soeara jang dibikin-bikin:

„Astaga! Tjilaka! Begimana bisa djadi pintoe soeda ditoetoep! Oh, soenggoe ke-

sian, orang jang soeda tiada mempoenjain iboe-bapa, hasilnya kebanjakan sama sekali tiada bisa mengarti adat-istiadat prihal perkawinan, lagipoen soeda tiada mengadjak barang satoe temen prempoean. Ach, tiada-kah ini bakal menerbitken orang poenja boeah-tertawaän!“

Sambil mengoetjapken ini perkataän, sambil ia menolak pintoe kamar dan toedjoeken pemandengan ka djoeroesan randjang, kemedian mendadak ia djadi ketawa poela dengen lakoe amat dingin, serta berkata dengen soeara menjindir :

„Kiong Hie! Kiong Hie! Perangkepan boeat perdjodoan ratoesan taon sekarang soeda rampoeng. Tetapi, ach, ini sepasang lilin telah menjala terlaloe besar, biarlah akoe goentingken sedikit soemboenja.“

Berbareng itoe, langsoeng ia samperin di sampingnya lilin itoe dan moelai menggoenting, aken tetapi ia tiada tjoema menggoenting, malahan soeda membikin padem semoea, hingga dalem sekedjapan kamar penganten jang terang-menderang, sekoenjoeng-koenjoeng beroepa amat gelap-goelita, tiada ada barang sedikit penerangan dari palita; kendati poen remboelan itoe koetika ada me-

mentjarken sinaran tjoekoep bagoes, tapi kerna dalem kamar tertotoeop dengen kree-kree dan lelangse jang tebel, membikin terangnya boelan tiada dapet djalan boeat bisa menemboes masoek ka dalem.

Dalem begitoe, sigra djoega ia memboeniken djeridji tangannja dan „Permadani poeti“ lantas melompat masoek ka dalem dengan tiada sekali mendengerken soeara. Ia deketken randjang dan dengan oedjoeng pedang memboeka klamboe, langsoeng menabas satoe kali di dalem itoe.

Aken tetapi, boekan sadja iapoenja pedang djato pada tempat kosong, malah sebaliknya dari dalem klamboe telah melajang kaloear sagoeloeng hawa dingin dan persinar terang, mendjoedjoe ka djoeroesan moekanja. Dan sekarang ia mengarti itoe boekan soeatoe alamat baek, lekas sekali ia moendoer setidak ka blakang dan kemoedian lari poela ka loear, dengan niatan aken pergi minggat sambil djalan melangkahi djendela; betoel sekoenjoeng-koenjoeng kedengeran dari blakang klamboe soeara sentakan jang aloes dan merdoe :

„Boedak bangsat, djangan lari!“

Berbareng dengen ini satoe soeara sen-

takan, satoe pana peloeroe telah melajang ka atas badannja begitoe djitoe, hingga membikin ia kepoekoel djato ka djoebin.

Tempo „Siloeman oeler poeti“ mendapat taoe di blakang randjang ada orang bersemboenji, laloe dengan tjepet ia angkat pedangnya menabas ka itoe djoeroesan dan tiada njana dari sitoe kombali telah melajang seroepa sendjata gelap, jang memoekoel sampe moekanja mendapat keloekaän dan dara mengoetjoer berketed-ketes.

Dalem begitoe, sekedjapan sadja di kamar blakang ratoesan obor telah terpasang terang sekali dan Go Tjiauw dengan komendirken Bwe Eng, Tho Eng, Kwi Eng, dan Lan Eng, madjoe menerdjang dengan berbareng.

Samentara itoe, si „Permadani poeti“ kendatipoen soeda mendapat keloekaän, toch ia masih bisa mengoempoelken tenaganja dan lompat poela ka atas poehoen Kwi Hoa, dari mana ia mengeloearken pana-gelapnya dan melepaskan dengan beroentoen-roentoen. Boeat mana, Tho Eng dan Lan Eng masing-masing telah kena satoe pana.

Ie Jan Kheng itoe tempo jang tiada maoe melepaskan sang „Siloeman oeler poeti“ telah

bertaroeng sengit sekali, jang dari dalem kammar teroes-teroesan berantem sampe di loear kammar, sedeng laen-laennja boedak prem-poean jang djoega ada bertempat di itoe gedong, rata-rata soeda dateng madjoe bantoe menjerang.

Saat itoe, kedengeran si Koepoe-koepoe poeti telah berseroe dengen soeara keras, katanja :

„Ja, Kwa-djin, biarlah lantas moendoer masoek ka dalem kammar, dikoeatir bakal ada sendjata gelap!“

„Tiada mendjadi halangan!“ Demikian Go Tjiauw poen bales menjaoet dengen soeara keras : „Akoe sendiri senantiasa ada orang jang melindoengin. Aken tetapi, kenapa toch tiada lekas-lekas mengasi pertandaän api!“

Ini separa perkataän jang paling achir telah menjedarken si Koepoe-koepoe poeti, jang sigra djoega lantas menitah Bwe Eng tjeplet mengambil bebrapa iket kajoe kering serta njalaken api sebrapa bisa lekas dan besar.

Demikianlah dalem sekedjapan sadja, api telah berkobar-kobar aint heibatnja, asep-asep item bergeneloeng-goeloeng mengeboel naek ka atas oedara.

Dan Oh Ko jang memang soeda berse-dia baek di bagian loear, tempo dapet liat begitoé, sigra djoega ia mengarti kontjo-kontjonja di bagian dalem telah moelai menggerakin tangan. laloe ia membawa sekalian pengikoet-pengikoetnya madjoe me-nerdjang ka dalem.

Betoel di itoe koetika djoega, Gak Peng dengen membawa satoe barisan Liauw-lo madjoe kaloeear dari pasanggrahan kiri, sedeng Pek Siauw dari pasanggrahan kanan; maka membikin temen-temennja Oh Ko jang dapet serangan dari doea moeka, dalem sedikit tempo boekan perkara moestail telah binasa sebagian besar.

Meliat glagat demikian, Oh Ko djadi me-nyetahoei jang perkerdjaännja antero telah gagal, hingga dirinja bakal tiada loepoet dari pengorbanan djikaloe ia moesti melawan lebi djaoe, maka dengen harepan aken djiwanja brangkali bisa ketoeloengan, laloe boeroe-boeroe ia berloetoet di atas tana dan mengadep pada Gak Peng ia minta orang ampoenja belas kesian.

„Ini semoea adalah menoeroet Siauw Leng Kan ampoenja akalan dan tipoe-daja,“ katanya, „dan kitaorang telah kliroe mende-

nger perbilangannja! Hareplah Tjiong-wie Eng Hiong soeka pikir bahoea akoe dengen Kapitein ada teritoeng orang berasal satoe dara dan toelang, serta kasi ampoen boeat selembar djiwakoe."

Pek Siauw ketawa berkakakan begitoe banget dan kemoedian berkata: „Oh, ja, bagoes sekali! Kaoe toch soeda dapet trima sepoeloe-riboe tael perak, djoega bakal mengambil satoe bini-moeda, boekanlah begitoe ada terlaloe seneng? Ja, sebagi matjemmoe jang tiada lebi daripada binatang andjing dan babi, masakah bisa mengarti aken itoe pri-kebedjikan satoe dara dan satoe toelang?“

„Ach, terlaloe ketjiwa boeat kita bertjakepan poela dengen ini matjem manoesia!“ Demikian Gak Peng soeda berkata dengen soeara keras dan mata beringas, sedeng pedang dalem tangannja zonder berganti saat telah diatjoeng ka badannja Oh Ko, jang langsoeng membikin badan siapa menjadi terkoetoeng doea.

Sesoeda itoe, marika laloe membawa lagi sekalian Liauw-lo, madjoe dengen pesat ka dalem boeat membri bantoean. Di mana, marika dapet liat Koepoe-koepoe poeti soeda bisa

menangkep „Siloeman oeler poeti” dan di-
iket dengen baek.

Itoe koetika dengen soeara amat piloe
sang „Siloeman oeler poeti” sedeng memin-
ta dikesianin sambil berkata:

„Ini semoea, jalih semoea terdjadi dari
lantaran tersesatnya kaoepoenja Ko-konsen-
diri, sedeng akoe dari bermoela sama sekali
tiada mempoenjain ini matjem niatan. Apa-
lagi badankoe sekarang soeda mengandoeng
hamil tiga boelan, maka akoe moehoen
biarlah A-kho soeka memandeng kapada le-
loehoer jang soeda wafat, bisa membebas-
ken kaoepoenja selembar djiwa!”

Mendenger ini perkataan, Koepoe-koepoe
poeti poen keliatan beroepa seperti orang
jang tiada tega hati, tetapi itoe tiada ber-
djalan lama, hanja dalem sesaat kemoedian
ia soeda balik berpikir:

„Ini prempoean soendel jang boekan sa-
dja berdiam dalem satoe kamar bersama de-
ngen „Permadani poeti”, malah djoega ba-
angoennja dan tidoernja senantiasa ada ber-
doea-doeaän, tiada bisa disangkal lagi ba-
hoea dalem setiap harinja marika soeda
tiada melakoeken itoe perboeatan kedji dan
nadjis. Djikaloe sekarang akoe moesti mem-

bebaskan padanja, nistjajalah? akoe gtiada
bakal mempoenjain moeka aken ketemoe
dengan leloehoerkoe di bawah tana!"

Dengen timboelnja ini matjem pikiran, la-
loe djoega si Koepoe-koepoe poeti menjen-
tak dengan soeara ketoes:

„Itoe niatan hendak menjilakaken ndjiwa-
koe, masi teritoeng satoe dosa ketjil, ter-
timbang daripada itoe perboeatan djidji
menodaken nama familiekoe! Siapakah jang
bisa mengetahoei bahoea itoe bibit kandoe-
ngan jang berada dalem peroetmoe, boekan
berasal dari bibit-haram, atawa dari mana
datengnja. Maka djoega akoe sekarang moesti
menjapoe bersi itoe noda jang orang telah
toempaken boeat namanja familiekoe, Oh Sie!"

Berhoeboeng dengen habisnja ini perka-
taän, menoedjoe betoel pada bagian peroet-
nja „Siloeman oeler poeti" dia menoesoek
dengen pedangnja. Dara jang mera sigra
djoega berhamboeran kaloeear kian-kemari
seoepama oedjan mera.

Dari bebrapa kali koetikan badan dan
gerakan kaki-tangan, „Siloeman oeler poeti"
laloe mengambil djalan menoedjoe ka djo-
roesan acherat.

Meningoe mosesoe.

Membasmi sanak kerna kebedjikan,
Kombali sekarang bisa kenampakan.
Enso diboenoe, enko dibinasakan,
Traoesa beroending boekan-boekan.

Menipoe moesoe.

Sjahdan si Koepoe-koepoe poeti setelah memboenoe „Siloeman oeler poeti“, laloe prenta orang-orangnya aken masoekin ini mait dalem peti-mati, begitoepoen maitnya Oh Ko, agar kemoedian bisa di atoer koeboer dengen memake oepatjara sepantesnya. Dan inilah sebab menginget aken itoe sangkoetan sebagai soedara dan enso.

Itoe tempo, jang tiada keliatan melaenken si „Permadani poeti“ saorang, setaoe ka mana ia soeda pergi semboenji.

„Djikaloe itoe orang sampe bisa pergi, nistjalalah kitapoenna tipoe-resia bakal terboeka.“ demikian berkata Go Tjiauw kemoedian, „maka itoe hareplah Tjiong Eng Hiong djangan menampik tjape dan soeka bergiat sama-sama boeat mentjari.

„Sabar doeloe.“ berkata Koepoe-koepoe poeti, „akoe pikir, itoe bangsat jang telah mendapat loeka berat, perginja djoega tentoe tiada bisa seberapa djaoe, boleh djadi dia ada bersemboenji di goenoeng blakang. Di sana, ada banjak gowa-gowa dan lobang-lobang jang membikin soeker aken kita bisa mentjari. Tetapi akoe mempoenjain soeatoe daja jang brangkali bisa berhasil.“

„Apakah boekan ada itoe satoe hoeroef dari dalem telapakan tangannja Tjoe Kat Liang?“ Berkata Go Tjiauw.

„Oh, njata djoega Long Koen tiada sala lagi ada Tjioe Dji!“ Berkata poela si Koe-poe-koepoe poeti dengen ketawa : „Kita poenja goenoeng blakang ada banjak ter-dapet rimba-rimba dari pepoehoenan kering, jang djikaloe kita lepaskan bebrapa banjak pana api ka itoe djoeroesan, dalem seke-djapan tentoe bisa berkobar-kobar dan menjala besar. Dengan berboeat begitoe, boekan sadja kita bisa mengandjoer aken balatentara moesoe sigra dateng manganter djiwa, djoega boleh membikin takoet dan lari seantero binatang-binatang boeas jang bertempat dalem sitoe, sedeng si „Perma-dani poeti“ seande betoel ada berdiam da-lem gowa-gowa, nistjaja djoega dia tentoe lari kaloear sebisa-bisanja. Tempo itoe, kita lantas menangkep padanja, begitoe gampang sama seperti orang membalik telapakan tangan.“

„Ini api, jalah api pertandaän!“ kata poela Go Tjiauw. „ada baek djoega lantas di-prenta Gak Peng dan Pek Siauw membawa satoe barisan balatentara pergi bersemboenji

di loear pasanggrahan dan menoenggoe sampe kapan soldadoe moesoe mendatengin, lebi doeloe boleh biarken marika madjoe masoek ka dalem pasanggrahan, sedeng kemoedian dengen satoe kali soeara meriam, kita boleh sigra menerdjang marika itoe dari loear dan dalem dengen berbareng. Demikian, kendatipoen Tek Tjioe mempoenjain barisan begimana besar djoega, toch traloepoet bakal terbinasa antero. Laen dari itoe, boeat bisa membikin marika itoe sama sekali tiada bertjoeriga, dalem pasanggrahan kita moesti atoer sebegitoe roepa, seperti soenggoe-soenggoe ada mengoendjoek alamat dan soeara dari kedoea fihak saling berantem. Dan marika itoe jang tiada mengarti aken kitapoenja keadaän di dalem, pasti mengira bahoea Oh Ko dan Kontjo-kontjonja tentoe soeda beroentoeng, laloe satoe persatoe madjoe masoek dengen bereboetan."

Koepoe-koepoe poeti manggoetin kepala-nja dan dengen teramat girang ia berkata:

„Bener sekali Long Koen ampoenia perkataän!“

Langsoeng ia mengeloearken titah Taken sekalian orang-orangnja lantas berkerdja sebegimana telah diatoer.

Sedikit saat kemoedian, di goenoeng blakang telah mengasi tjahaja jang amat terang, api berkobar-kobar sanget heibat, bergeloeng-goeloeng naek sampe beberapa toembak ka atas, hingga mirip sebagai laoetan api dengan ombak-ombaknya.

Kolonel dan Assistent-resident dari Tek Tjioe, jang sedeng memandeng-mandeng di bawah goenoeng, dapet liat api jang pertama itoe moelanja terang tapi blakangan padem poela, mendjadi marika masi belon brani lantas bergerak dan ini api jang kadoea kalinja, begitoe heibat dan berkobar besar, djoega kedengeran dibarengin dengan soeara-soeara peprangan jang seroe sekali; inilah ada sozatoe tanda jang tiada bisa kliroe poela bahoea marikapoenna barisan bagian dalem telah berkerdja baek.

Sigra djoega Siauw Leng Kan dititah membawa satoe barisan soldadoe dan sebagi barisan di moeka haroes menerdjung masoek lebi doeloe, sedeng ia sendiri bersama Tiekoan adalah mendjadi barisan blakang, jang berdjalanan menoedjoe dengan pesat ka pasanggrahan itoe.

Tatkala sampe deket pasanggrahan, kedengeranlah dalem itoe soeara-soeara orang

dand sendjata beradoe, mirip seperti goenoeng roeboe dan tana amblas. Antara mana, lapat-lapat bisa kedengeran soeara kaokannja orang jang membilang :

„Si Koepoe-koepoe poeti soeda lari me-noedjoe ka goenoeng blakang ! Hajo, lekaslah pergi tangkep ! Lekas pergi tangkep !“

Boekan alang-kepalang girangnya Siauw Leng Kan, kegoembirahannja semingkin-mingkin bertamba, tjetep ia menitah orang pergi memibri kabar pada barisan blakang boeat soepaja madjoe lebi lekas, dan djoga ia mengoendang Song Kie dan Kam Joe Tie membawa satoe barisan soldadoe pergi ka goenoeng blakang aken bersedia boeat menangkep si Koepoe-koepoe poeti.

Apabila soeda sampe di atas goenoeng Hong Beng San, tertampak pintoe pasang-grahan ada terpentang besar, dalem mana tiada keliatan barang satoe soldadoe penjamoen. Samentara itoe, barisan blakang beroentoen-roentoen poen telah sampe ka sitoe, laloe dengen satoe kali soeara tampik-sorak, marika madjoe masoek ka dalem.

Aken tetapi, tiada sekali bisa dinjana, jang baroe sadja marika bisa masoek ka dalem pintoe pasanggrahan, soeara sorakan tadinja

kedengeran begitoel rioeh, sekarang menda-
dak linjap sama sekali. Dan tiba-tiba satoe
soeara meledak jang terlaloe keras, mela-
jang menoedjoe ka atas oedara. Berbareng
itoe, Gak Peng dan Pek Siauw dengen se-
kalian tentara semboenji, rata-rata mener-
djang masoek dari loear ka dalem pasang-
grahan. Koepoe-koepoe poeti dan Jan Kheng
membawa satoe barisan Liauw-lo dari da-
lem madjoe menjerang kaloear.

Melajang-lajang pana-peloeroe, jang pe-
set seoepama bintang anjoet; beriboe-riboe
anak-pana djato toeroen sebagi oedjan. De-
mikian heibatnja pihak Koepoe-koepoe poe-
ti menerdjang moesoenna, kitapoenna pa-
doeka kolonel achirnja terbinasa di antara
anak-pana jang banjak; sedeng itoe kandjeng Assistent-resident dari Tek Tjioe, ta-
ngan memegang sebilah pedang monster.
adalah giginja beradoe-radoe seperti orang
kedinginan. Matanja melirik-lirik ka ampat
pendjoeroe, tetapi roepanja seperti tiada ke-
liatan ada djalanen boeat lari, tjoema
satoe roempoenan bamboe jang berdempet-
an dengen goenoeng, keliatannja tiada ada
orang jang mendjaga, sigra djoega ia lantas
mengeloearken itoe kebisaän menobros lo-

bang, langsoeng menoedjoe masoek ka dalem roempoenan itoe.

Tetapi ini perboeatan dapat diliat oleh sala satoe Liauw-lo, jang dengen tjepe lan-tas menggaet dia itoe dengen satoe gaetan dan geret kaloeear sambil memandeng roepa orang.

„Ha, ha,” achir-achir ia ketawa dan ber-kata teroes; „Oh, angkaoe Tek Tjioe am-poenja Taij Loja! Di sini boekan ada tem-pat jang baek; toenggoe sebentar, kaoe ten-toe dioendang masoek ka dalem pasanggra-han boeat ketemoe dengen Kapitein !”

Maskipoen beroelang-oelang sang Tie-koan meminta orang poenja rasa kesian, toch itoe Liauw-lo sama sekali tiada maoe ambil perdoeli.

Dan Siauw Leng Kan dengen membawa sekalian soldadoe negri, tjoba djoega mela-wan mati-matian, tapi apa si maoe, oleh kerna hati orang kebanjakan soeda riboet, tiadalah heran tentara Tek Tjioe, sebagian soeda melariken diri masing-masing dan se-bagian besar lagi soeda pada terbinasa; begitoepoen Siauw Leng Kan traoyereng te-lah dapat loeka-loeka jang berbahaja, men-djadi ia tiada mempoenjain taksiran poela

boeat bisa melawan lebi lama, sekoenjoeng-koenjoeng orang dapet denger ia berseroe dengen soeara keras:

„Akte, Lie Kan Sam, poen teritoeng satoe orang ternama di antara orang-orang gaga; tjoema lantaran hendak memboeroe gandjaran dan kekajaän, soeda membikin binasa djiwa manoesia boekan sedikit. Oh, matikoe poen soeda terlaloe kasep !“

Berbareng habisnya ini oetjapan, laloe dengen pedangnya ia membinasaken djiwanja sendiri !

Sesoeda Siauw Leng Kan binasa dan kontjo-kontjonja antero mendjadi bersi kerna mati maoepoen kerna melariken diri, Koe-poe-koepoe poeti laloe titah panggil poelang antero kawan-kawannja, jang setelah dipreksa djoemblanja, kemoedian ternjata selaen dari sedikit Liauw-lo jang mati atawa loeka, poen Ie Jan Kheng soeda tiada ke liatan mata-idoengnya.

Hal ini telah membuat boekan ketjil terprandjatnja Go Tjiauw.

„Djikaloe Jan Moaij sampe kedjadian koe-rang baek,“ katanja: „Och, begimanalah akoe ini !“

Tjepet sekali dititah banjak orang aken

pergi mentjari di ampat pendjoeroe, tetapi beginama djoega soeda ditjari, toch semoea tinggal tersia-sia. Dalem begitoe, tiba-tiba orang dapet denger Tho Eng ampoenja soeara kaokan menjeboet:

„Ie Kho Nio soeda mengoedak moesoe sampe di goenoeng blakang !“

Mendenger ini soeara, Koepoe-koepoe poeti lekas-lekas memboeroe ka itoe djoeroesan, djaoe-djaoe ia menampak Jan Kheng dengen Bwe Eng dan bilang blas tentara-pelindoeng lagi saling berantem dengan moesoe; pihak mana ada dikepalaï oleh doeang, jaitoe Song Kie dan Kam Joe Tie, jang kedoeanja ada keliatan amat gaga-perkasa.

Dengan tiada berpikir lama, langsoeng Koepoe-koepoe poeti mengambil iapoenja pana-peloeroe, lebi doeloe ia lepaskan menoedjoe pada Kam Joe Tie, siapa berbereng dengen sampenja itoe peloeroe laloe djato terdjoengkel ka atas tana. Dan Song Kie lekas sekali balikin badannja hendak melariken diri, tetapi tiada beroentoeng Jan Kheng ampoenja pedang, sebagi kilap soeda menabas lehernja, djato tergoeling-goe-ling ka bawah goenoeng.

Bwe Eng dan laen-laen laloe dengen amat bernapsoe madjoe mengamoek sampe semoea soldadoe negri jang dibawa oleh itoe doeа orang, tiada satoe djoega jang bisa melariken diri.

Betoel selagi marika itoe hendak balik poelang, sekoenjoeng-koenjoeng dateng angin menganter seroepa baoe jang amat sangit dan dari blakang goenoeng lompat kaloear saekor matjan besar, jang moeloetnja ada membawa satoe boetir kepala manoesia; roepanja itoe binatang sedeng maoe lompat masoek ka dalem seboeah gowa.

Meliat begitoe, Jan Kheng tjepeг semboeniken dirinja di blakang poehoen, langsoeng kaloearken satoe pana dan lepaskan menoedjoe di betoelan matanja itoe matjan dan ternjata pana soeda bisa menantjep djiroe, hingga ia menggeroeng keras satoe soeara, melompat tinggi ka atas dan kemoedian djato tergoeling ka bawah tana rata, sedeng itoe kepala orang terlepas dari moeloetnja dan terlempar di soeatoe tempat jang berpisa bebrapa meter,

Satoe kali lompat, Jan Kheng soeda bisa mendeketin sambil mengawasin, tertampaklah itoe seperti mirip kepalanja si „Perma-

dani poeti", tapi lantaran penoe berloemoeran dengen dara atawa kotoran dan tertjampoer dengen pasir dan tana, maka itoe orang tiada bisa liat dan perbedaken dengan teges.

„Inilah bagoes sekali!“ Demikian Kwi Eng berseroe: „Itoe badjingan poeti soeda balik asal! Liat, atas kepalanja masih teriket dengen setangan item? Ie Kho Nio, häreplah kaoe boleh poelang sadja lebi doeloe, biarken akoe mengambil satoe gaetan nanti membawa poelang ini kepala.“

Go Tjiauw jang djoega ada toeroet dateng ka sitoe, boeroe-boeroe menjamboet, seraja menoentoen tangannja Jan Kheng, katanja:

„Pana malaekat demikian roepa, sesoeng goenja djarang sekali tertampak!“

„Kita moesti bersoekoer kapada Allah, jang A-moaij soeda tiada koerang soeatoe apa!“ Berkata Koepoe-koepoe poeti dengen ketawa, „sebaliknya seande masih djoega tiada dapet ditjari, tiada taoe beginama Long Koen aken seselin dirikoe?“

Jan Kheng melirik manis satoe mata dan berkata:

„Djanganlah tjoema ketawaken akoe. Liat